



Inatsisartunut ilaasortaq  
Mariane Paviassen Jensen

### § 37 naapertorlugu apeqquut nr. 235/2025-mut akissut

Allakkat ulluat: 20-03-2026  
Suliap nr. 2025 - 26950

Matumuuna apeqqutinut tulliuuttunut akissutit nassiunneqarput.

Akissummut atugassamik Aningaasaqarnermut Sulisoqarnermullu Aqutsisoqarfimmit ilapittuutit pissarsisoqarpoq.

P. O. Box 1037  
3900 Nuuk  
Tel. (+299) 34 50 00  
Fax (+299) 34 63 50  
E-mail: oed@nanoq.gl  
www.naalakkersuisut.gl

#### 1. Naalakkersuisunit sulissutigineqarpa tjenestemanditut atorfeqartut Naalagaaffiup ataatsip ataaniittut assigiimmik aningaasarsiatigut, utoqqalinersiatigullu atugassaqartinneqalernissaat?

##### Akissut:

Aap. Naalagaaffimmi sulisut aningaasarsiaannut tunngasut suliassaqarfimmi kattuffiit isumaqatiginninniarsinnaatitaasut suleqatigalugit isumaqatiginninniutigineqartarput. Ilaatigut § 37 naapertorlugu apeqquuteqaammumut 108/2023-mut, 74/2024-mut aamma 102/2024-mut akissuteqaammi paasisutissiissutigineqartut Naalagaaffiup sulisuisa akornanni assigiimmik aningaasarsiaqarnissamik siunertat Naalakkersuisut piffissami sivisuumi tapersersimavai. Taamaattumik Aningaasaqarnermut ministeri Nicolai Wammen aamma ataani atsiortoq ulloq 16. februar 2026 ataatsimoorlutik tusagassiutitigut nalunaarummik nassiussisinnaammata naammagisimaarpara, taannalu ilaatigut imatut imaqarpoq:

*"Atugassarititaasut Danmarkimi naalagaaffiup sulisuinut atuuttut atuutsillugit maannakkut atugassarititaasut Kalaallit Nunaanni naalagaaffimmi tjenestemandinut naligiissinneqarmata, alloriarneq pingaaruteqarpoq. Maannakkut naalagaaffimmi tjenestemandinut aammalu isumaqatigiissutit malillugit sulisunut – aammalu minnerunngitsumik tjenestemandinut soraarninngoreersimasunut - naligiissisinnissap sulissutigineqarnera ingerlaqqittussanngorpoq. Taamaalilluni suliaqarnissaq taanna qilanaaraarput."*<sup>1</sup>

Danskit naalakkersuisuisa tjenestemandit danskit naalagaaffiata nunatsinni atorfeqartitai kiisalu tjenestemandit soraarnerussutisiaat pillugit inatsisit allanngortinneqarnerat pillugu inatsisissatut siunnersuutip folketingimi ulloq 29. januar 2026 akuerineqarnera tunngavigalugu tusagassiutitigut nalunaarut nassiunneqarpoq. Inatsit akuerineqartoq uani atuarneqarsinnaavoq:

[https://www.ft.dk/samling/20251/lovforslag/L26/som\\_vedtaget.htm](https://www.ft.dk/samling/20251/lovforslag/L26/som_vedtaget.htm)

<sup>1</sup> Tusagassiutitigut nalunaarut tamakkiisoq uani takuuk:

<https://fm.dk/nyheder/nyhedsarkiv/2026/februar/regeringen-indgaar-aftale-om-ligestilling-af-loen-og-ansættelsesvilkår-for-statens-tjenestemaend-i-groenland/>

Siunnersuut pillugu ima paasissutissiisoqarpoq:

*”Tjenestemandit naalagaaffiup Danmarkimi, Savalimmiuni Kalaallilu Nunaanni atorfeqartitaasa atorfinitsitaanermi soraarnerussutisiatigullu atugassarititai pillugit tjenestemandit pillugit inatsimmi aalajangersakkat sapinngisamik assigiissinneqarnissaat, kiisalu tassunga atasunik inatsimmi allangortitsinissaq, inatsisissatut siunnersuummi siunertarineqarpoq.*

*Kunneqarfiup immikkoortuini tamani naalagaaffiup atorfeqartitaani atorfinitsitaanermi soraarnerussutisiaqarnermilu atugassarititaasut naligiissinniarneqarnerat pillugu naalakkersuisut aalajangernerat, inatsisissatut siunnersuummut tunuliaqutaavoq.”<sup>2</sup>*

Inatsisip atuutilerana ilaatigut tjenestemandit soraarnerussutisiaat 1. april 2026 aallarnerfigalugu naalagaaffimmi tjenestemandinut soraarnerussutisiatigullu atugassarititaasut naligiit tunngavigalugit naatsorsorneqartalissapput. Tamatumani saniatigut inatsit, tjenestemandit ullumi utoqqalinersiaqareertut aamma Danmarkimi najugaqareertut, maanna utoqqalinersiai naleqqussarneqassappata, naleqqussaaneq Danmarkimi tjenestemandit procentiisa annertussusaattut aamma piffissaattut pisassaaq.

Nunatsinni Namminersorlutik Oqartussani kommuniniluunniit tjenestemandit atorfeqartitanut nunatsinni inatsisip malinneqarnerat erseqqissaatigineqassaaq. Taamaalilluni Namminersorlutik Oqartussani kommuninilu tjenestemandinut aningaasarsiaqarnikkut atorfinitsitaanikkullu atugassarititai, sulisitsisut sinnerlugit Aningaasaqarnermut Sulisoqarnermullu Aqutsisoqarfimmit isumaqatiginninniutigineqartarput. Isumaqatiginninniarnerit kattuffinnik isumaqatiginninniarsinnaatitaasunik isumaqatiginninniutigineqartarput. Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaanni nr. 21, 18. december 2003-meersumi § 55, imm. 1 naapertorlugu soraarnerussutisiallit Namminersorlutik Oqartussat kommunillu ataaniittut danskit tjenestemandinut inatsisaat allangortinneqarqammarsoq naapertorlugu soraarnerussutisiaqartinneqassapput.

## **2. Naalakkersuisunit anguniarneqarpa tjenestemandit atorfeqareerlutik soraarnerussutisiaasa Naalagaaffiup ataatsip iluaniittut assigiimmik soraarnerussutisiaqalernissaat?**

### **Akissut:**

Aap. Tjenestemandi Danmarkimi imaluunniit Kalaallit Nunaanni najugaqarnersoq apeqqutaatinnagu, tjenestemandit soraarnerussutisiaasa naligiissinneqarnissaat pillugu kissaateqarneq pillugu danskit naalakkersuisui ingerlaavartumik uanga Naalakkersuisutut attaveqarfigisimavakka.

Danskit Sulisunut Piginnaasaqarnernullu aqutsisoqarfiata aamma Namminersorlutik Oqartussat ataatsimoorlutik Kalaallit Nunaanni Danmarkimilu tjenestemandit soraarnerussutisiaasa teknikkikkut oqaluttuarisaanermilu assigiinngissutaasa misissornissaat ukkataralugu, allakkiamik suliaqarnissaat tapersorsorlugu, ataatsimoorluni tusagassiutitigut nalunaarummi siuliani taaneqartumi taamaalilluni oqaatigineqarpoq.

<sup>2</sup> Inatsisissamut siunnersuut taanna uani takuneqarsinnaavoq:  
<https://www.ft.dk/samling/20251/lovforslag/L26/index.htm>

Taamaattumik allakkiami siunnerfigineqarpoq Kalaallit Nunaanni imaluunniit Danmarkimi najugaqarneq aammalu soraarninngornermut piffissaq apeqqutaatinnagit tjestemandinut soraarninngortunut tamanut soraarnerussutisiassat naligiissinneqarnissaat qanoq qulakkeerneqarsinnaanersoq siunnersuummik suliaqarnissaq.

**A) Taamaappat suliaq sumut killippa?**

**Akissut:**

Aap. Apeqqutinut 1-imut aamma 2-mut akissuteqaat innersuussutigineqarpoq.

**B) Taamaangippat suna pissutigalugu naalackersuisunit assigiinngisitsineq akuersaarneqarpa?**

**Akissut:**

Assigiinngisitsineq Naalackersuisut akuerinngilaat.

Aammattaaq apeqqut 1-imut aamma 2-mut akissut takuuk.

Inussiarnersumik inuulluaqqusillunga



Múte B. Egede